

Na osnovu člana IV.4.a) Ustava Bosne i Hercegovine, Parlamentarna skupština Bosne i Hercegovine na 7. sjednici Predstavničkog doma, održanoj 27. jula 2011. godine, i na 5. sjednici Doma naroda, održanoj 14. septembra 2011. godine, usvojila je

ZAKON O IZMJENAMA I DOPUNAMA ZAKONA O MINERALNIM ĐUBRIVIMA

Član 1.

U Zakonu o mineralnim đubrivima ("Službeni glasnik BiH", broj 46/04), iza člana 4. dodaje se član 4a. koji glasi:

"Član 4a. (Skladištenje i rukovanje)

1. Mineralna đubriva u prometu moraju se skladištiti u uslovima koji osiguravaju održavanje njihovog kvaliteta i mogućnost korištenja u poljoprivrednoj proizvodnji.
2. Detaljnije uslove u pogledu skladištenja i rukovanja mineralnim đubrivima s ciljem očuvanja njihovog kvaliteta propisuje Vijeće ministara na prijedlog Uprave u saradnji s nadležnim organima entiteta i Brčko Distrikta".

Član 2.

Član 5. mijenja se i glasi:

"Član 5. (Registar mineralnih đubriva)

1. Prije stavljanja u promet mineralna đubriva moraju biti upisana u Registar mineralnih đubriva (u daljnjem tekstu: Registar), koji vode nadležni organi entiteta i Brčko Distrikta za administrativno područje iz svoje nadležnosti, a Uprava vodi centralni registar za cjelokupnu Bosnu i Hercegovinu.
2. Upis u Registar vrši se na osnovu zahtjeva proizvođača, odnosno uvoznika mineralnih đubriva nadležnom organu entiteta, odnosno Brčko Distrikta.
3. Rješenje o upisu u Registar iz stava 1. ovog člana donosi se ako đubrivo odgovara propisanim uslovima kvaliteta propisanim ovim zakonom i propisima donesenim na osnovu njega.
4. U Registar se ne upisuju:
 - a) mineralna đubriva koja se proizvode radi izvoza;
 - b) mineralna đubriva koja se koriste u naučnoistraživačke svrhe i u količinama potrebnim za te svrhe.
5. Za mineralna đubriva iz stava 4. tačke b) ovog člana naučnoistraživačka organizacija dužna je Upravi podnijeti zahtjev za korištenje mineralnog đubriva u naučnoistraživačke svrhe u skladu s članom 11. ovog zakona.

6. Detaljnije uslove za upis ili brisanje iz registra te sadržaj, oblik i način vođenja registra propisuje Vijeće ministara na prijedlog Uprave, uz prethodno mišljenje nadležnih organa entiteta i Brčko Distrikta".

Član 3.

Član 6. mijenja se i glasi:

"Član 6.

(Registar distributera i uvoznika)

1. Prometom mineralnih đubriva mogu se baviti distributeri koji su registrirani za obavljanje navedene djelatnosti u skladu s propisom kojim se uređuje registracija privrednih subjekata i koji su upisani u Registar distributera i uvoznika.
2. Uvozom mineralnih đubriva mogu se baviti uvoznici koji su registrirani za obavljanje navedene djelatnosti u skladu s propisom kojim se uređuje registracija privrednih subjekata i koji su upisani u Registar distributera i uvoznika.
3. Distributeri i uvoznici koji se bave prometom mineralnih đubriva upisuju se u Registar distributera i uvoznika ako ispunjavaju uslove za skladištenje mineralnih đubriva i uslove u pogledu stručne spreme.
4. Upis u Registar vrši se na osnovu zahtjeva distributera, odnosno uvoznika mineralnih đubriva nadležnom organu entiteta i Brčko Distrikta.
5. Detaljnije uslove za upis ili brisanje iz Registra distributera i uvoznika te sadržaj, oblik i način vođenja Registra propisuje Vijeće ministara na prijedlog Uprave, uz prethodno mišljenje nadležnih organa entiteta i Brčko Distrikta".

Član 4.

Iza člana 6. dodaje se član 6a. koji glasi:

"Član 6a.

(Uvoz)

1. Pošiljke mineralnog đubriva koje se namjeravaju uvesti u Bosnu i Hercegovinu podliježu obaveznoj kontroli na graničnom prijelazu na kojem je organizirana fitosanitarna inspekcija.
2. Nadzor nad uvozom mineralnih đubriva vrši fitosanitarni inspektor.
3. Detaljniji postupak obavezne kontrole prilikom uvoza propisuje Vijeće ministara na prijedlog Uprave, uz mišljenje nadležnih organa entiteta i Brčko Distrikta".

Član 5.

U članu 11. stavu 1. iza riječi "Uprave," dodaju se riječi: "uz prethodno mišljenje nadležnih organa entiteta i Brčko Distrikta".

Član 6.

U članu 14. stavu 1. iza riječi: "poljoprivredni inspektori" dodaju se riječi: "i fitosanitarni inspektori".

Član 7.

Iza člana 16. dodaje se član 16a. koji glasi:

"Član 16a.

(Ovlaštenja fitosanitarnog inspektora)

Fitosanitarni inspektor, na osnovu ovog zakona i propisa donesenih na osnovu ovog zakona, ima sljedeća ovlaštenja:

- a) vršenje pregleda dokumentacije koja prati pošiljku prilikom uvoza, pregled pošiljke, pakovanja i prijevoznog sredstva;
- b) provjerava da li su mineralna đubriva upisana u Registar;
- c) provjerava da li je uvoznik upisan u Registar distributera ili uvoznika mineralnih đubriva;
- d) provjerava da li su mineralna đubriva označena na propisan način;
- e) provjerava da li je proizvođač, odnosno uvoznik dostavio nalaz analize đubriva i mišljenje kojim se dokazuje da je amonij-nitratno đubrivo s visokim sadržajem azota zadovoljilo testiranje otpornosti na eksplozivnost;
- f) uzima uzorke mineralnih đubriva prilikom obavezne kontrole pri uvozu bez naknade vrijednosti uzoraka;
- g) obavlja i druge potrebne radnje za provođenje ovog zakona i propisa donesenih na osnovu ovog zakona".

Član 8.

Iza člana 17. dodaje se član 17a. koji glasi:

"Član 17a.

(Mjere fitosanitarnog inspektora)

U obavljanju inspekcijaskog nadzora po ovom zakonu i propisima donesenim na osnovu ovog zakona, fitosanitarni inspektor može:

- a) privremeno zabraniti uvoz mineralnih đubriva ako je potrebno otkloniti nepravilnosti na pošiljci ili na popratnoj dokumentaciji;
- b) narediti otklanjanje nepravilnosti ako utvrdi da Zakon o mineralnim đubrivima nije primijenjen ili je nepravilno primijenjen;
- c) zabraniti uvoz i narediti vraćanje pošiljke;
- d) zabraniti uvoz i oduzeti pošiljku;

- e) zabraniti promet uvezene količine mineralnih đubriva ako rezultati laboratorijskog ispitivanja nisu u skladu s ovim zakonom i propisima donesenim na osnovu njega;
- f) narediti povlačenje iz prometa uvezene količine mineralnih đubriva".

Član 9.

Član 18. mijenja se i glasi:

"Član 18. (Kaznene odredbe)

1. Novčanom kaznom u iznosu od 3.000 KM do 50.000 KM kaznit će se za prekršaj pravno lice ako:

- a) proizvodi, uvozi ili stavlja u promet mineralno đubrivo koje ne ispunjava propisane uslove u pogledu minimalnog kvaliteta (član 4. stav 1.);
- b) mineralno đubrivo u prometu neopravdano označi oznakom "EC FERTILIZER" (član 4. stav 3.);
- c) mineralno đubrivo drži u uslovima koji ne osiguravaju održavanje njegovog kvaliteta i suprotno detaljnijim uslovima u pogledu skladištenja i rukovanja mineralnim đubrivima (član 4a.);
- d) stavlja u promet mineralno đubrivo, a za to nema potrebno rješenje (član 5. stav 3.);
- e) vrši promet mineralnih đubriva, a nije upisan u Registar distributera i uvoznika (član 6. stav 1.);
- f) vrši uvoz mineralnih đubriva, a nije upisan u Registar distributera i uvoznika (član 6. stav 2.);
- g) stavlja u promet amonij-nitratno đubrivo koje nije zapakirano (član 7. stav 1.), i ako stavlja u promet amonij-nitratno đubrivo koje ne ispunjava propisane posebne uslove (član 7. st. 2. i 3.);
- h) stavlja u promet mineralno đubrivo koje nije označeno na propisan način i ako mineralno đubrivo nema kvalitet naveden na oznaci i ako mineralno đubrivo stavlja u promet u suprotnosti s propisanim detaljnijim uslovima o načinu pakiranja, deklariranja i označavanja (član 9.);
- i) nadležnim organima ne dostavi potpune podatke o prometu mineralnih đubriva u propisanom roku (član 10. stav 1.);
- j) upotrebljavaju uzorke mineralnih đubriva koji ne ispunjavaju propisane uslove u pogledu minimalnog kvaliteta, bez dozvole Uprave (član 11. stav 1.);
- k) upotrebljava mineralno đubrivo u suprotnosti s članom 12.;
- l) inspektoru ne omogući nesmetano obavljanje inspeksijskog nadzora na osnovu ovog zakona ili ga pritom ograničava ili mu ne da tražene dokumente, podatke, objašnjenja ili predmete (član 14. stav 2.).

2. Za prekršaj iz stava 1. ovog člana kaznit će se i odgovorno lice u pravnom licu novčanom kaznom u iznosu od 2.000 KM do 20.000 KM.

3. Za prekršaj iz stava 1. ovog člana kaznit će se pojedinac ako obavlja samostalnu poslovnu djelatnost novčanom kaznom u iznosu od 2.000 KM do 20.000 KM.

4. Za prekršaj iz stava 1. ovog člana kaznit će se fizičko lice novčanom kaznom u iznosu od 1.000 KM do 10.000 KM ".

Član 10.

Članovi 19. i 20. brišu se.

Član 11.

U članu 21. iza stava 1. dodaje se novi stav 2. koji glasi:

"2. Do imenovanja fitosanitarnih inspektora obaveznu kontrolu pošiljaka pri uvozu obavljaju:

- a) u Federaciji Bosne i Hercegovine granični inspektori za zaštitu bilja;
- b) u Republici Srpskoj republički poljoprivredni inspektori".

Član 12.

(Stupanje na snagu)

Ovaj zakon stupa na snagu osmog dana od dana objavljivanja u "Službenom glasniku BiH".

Broj: 01,02-02-2-53/10
14. septembra 2011. godine
Sarajevo

Predsjedavajući
Predstavničkog doma
Parlamentarne skupštine BiH

dr. Denis Bećirović

Predsjedavajući
Doma naroda
Parlamentarne skupštine BiH

Ognjen Tadić